



16 September 2020
Masmur 23:1-4



MBALMBAL SI MERATAH



Kenca Jesus ngerana, "Aku kap pintu" ngerana ka IA kerna permakan. Nina: "Aku kap permakan si tuhu-tuhu." Permakana si tuhu-tuhu nggit ngasamken kesahna guna biri-biri e kerina. Jadi labo terjeng gegeh tapi pe kesah Jesus iasamkenNa lako njagai ras memelihara biri-biriNa. Perayaken Jesus selaku permakan, uga maka biri-biriNa aman, teneng, cukup nakan pangan, sehat ras selamat. Emaka tetap ibabaiNa biri-biriNa kempak mbalmbal si meratah, si la kekurangan lau ras dukut si meratah. IbabaNa pe tongkat ras kayan-kayanNa lako njagai biri-biri e i bas musuh-musuhna nari. Bagi si isaksiken Daud arah ende-endenna. La pernah ia mbiar amin i tengah mbalmbal si meratah, tupung ia njagai biri-birina. La aru atena amin pe i bas kelbung si mberat sabap igejapna maka Tuhan lalap ras ia. Bage me pengkawali Tuhan pe geluhta, kita kap biri-biriNa, si keleng kal ateNa. Tuhu bas kegeluhen doni enda labo lalap jumpa mbalmbal si meratah, banci jadi jumpa kita padang gurun, entah taneh mesawang, ndarat i bas mbal-mbal meratah nari. Sada gambaren kiniseran ras perbeben si mesangat. Erbage-bage curak kiniseran si man jumpan, lenga dung sada nggo ka reh si terkeleken. Bagi kecibal Tanah Karo lenga ngadi pandemi corona, erupsi ka Deleng Sinabung, erga sinuan-sinuan pe bagi si kurang, tindihi abu deleng ka, si turah e pe banci ka ceda. I je me perlu teridah kiniteken e, si gejap Tuhan memelihara i tengah pandemi ras erupsi. La murah putus asa amin mberat si man baban. Tuhan Jesus permakan si tuhu-tuhu, Kesah ras darehNa njamini kita. Emaka tetaplah kita erdalan arah dalam si ibabaiNa, nggagat ku mbal-mbal meratah si isikapkenNa amin seh ku mbal-mbal e kita mentasi tantangan. Tapi tetap erpengarapen ras megenggeng. Itegu-teguNa kita.